

ድያድ

ማጽጥ ሀሺሽን ሀይጢ ይስኩ ጋህ

ማጽጥ ሀሺ ካንጉሽ ጋህ ጋድ ሀይጢ ይስኩዌ። ዩሪ ዶዳ፥ ጫራ፥ ካንግ ኢሥ ጎብቃኑሻ፥ አሣ ኤንዲስ ካንግ ዎሳሳን ሶይ አሣ ድያዳሳን ሀይጢ ይስኩዌ። ማጽጥ ሀሽ ይሲንድ ቃዝቂ አሣ ዎሳሳማን ጩቡ ቃይጽኒ ጋዳሳና፥ ጩቡ ይሲንድ ኢራቲንድ ዎሳሳን ዶድ ቶሕን ቤሻሳን ሀይጢ ይስኩዌ። ጩቡይ ዶድ ቶሕን አቲ ቤሹሻሚንድ ዩሪ ሀርኬሳን ይሣሳን ይቃን ጸጋንቂ ይስኩዌ።

ማጽጥ ሀሽካን ይርሽ ታማ ናማን ኡጥንሲ ይስኩሽ ቤሻጉሽ ናሳ ማጥ አብርሀም ማስቲ ይስኩሻ፥ ይ አሥንዳ ጋህን ሀይጢ ይስኩዌ። አብርሀም ይሲንድ ዩሪ ይ ኩርሱሽ፤ ኢባራስ፤ ዩሪንድ ባዩሽን ሀይጢ ይስኩሽስ ሲስኪ ይያም አቂ ይስቱሽ አሣ ጊዜዎ።

ናሳ ኡሻ፥ ይ ንያእንዳ ቦዳም ዩሪ አይሁድ አሥንዳ ባዩሽን ባድ ባ ኢሥ አሜንዲስ ማጥ ዶድ አሣ ባ ዛራሜንድ አሥኒ ሹኑዌ። አሥንዳ ኤንድ ይያጋ ቦዳማን ዩሪ ዶድ ቶሕን ይስኬንድ አሥንዲስ ጥያሥና ባ ማኩሽስ ይሥኒ ኩርሱዌ።

ድያዳጋ ጋድ

1 ¹ዩሪ ካንጉሽ አፓርቅን ዶድ ይሢ ጫር ይሢ ድያዱ።
²ኡሻም ዶዲ ኤራጎን ይ ቶሕን ካያጊ ይስትን ሀር ይስቱ። ሺጥ ጢጳንቂ ይስኩሽ ኡርዲ ዶድ ቶሕን ካንግ ይስቱሽ ይዝ ዴብም ይስትን፤ ዩር ማሺ ሶአ ኡሽ ቶሕን ይስቱ።

³ዩሪንድ «ጮብቲ ፔትማኪ» ማክን ጮብቲ ፔቱ።
⁴ይሲንድ ጮብት ኡሺ ይ ካዣስን ቤቅንሲ ጮብት ይሢ ኡርድ ይሢ ባድ አሡ።
⁵ይሲንድ ጮብቲስ ፓሻ ማኪ፤ ኡርዲስ ጡም ማኩ። ኡሻሚንድ ዶዲ ጡሚ ዎንትን ማጥ አቅ አቱ።

⁶ዩሪንድ «ሶአ ሀይቅን ይስትንሱሻ፥ ዶድን ይስትንሱሻ ቤሽክንሱሺ ኡሽ ዴንትካን ፔትማኪ» ማኩ።

⁷ይሲንድ ኡሺስ ይሥንሲ ሶአ ይ ካማም ይስኩሻ፥ ይ

ዱንጋም ይስኩሻይስ ባድ አሠ። ኡሽ ይሲንድ ዩሪ
ሀይሙሽዎጥን ፔቱዌ። ስይሲንድ ኡሺስ ጫር ማኩ።
ኡሻሚንድ ዶዲ ጡሚ ዎንትን ናም አቅ አቱ።

⁹ ዮሪንድ «ጫር ዱንጋም ይስኩሽ ሶኢ ማጥን አትማኬ፤ ኩሣ ኮሊንድ ኬስኪ ቤስትማኬ» ማኩ። እብ ይሲንድ ይሲ ሀይሙሽዎጥን ፔቱ። ¹⁰ ይሲንድ ኩሣ ኮል ኡሺስ ዶድ ማኪ፤ ሶአ ማጥን ጋብታንቂ ይስኩሺስ ባህር ማኩ። ይሲንድ እብ ይ ካዦሱሺስ ቤቁ። ¹¹ ዮር ይሲንድ «ዶዲ ኮች ሀይ ጳርስማኬ። እብ ጳቂ ይስኩሺንድ ሙእ አፓ ባ ዛራም ዛራም ይስቲ አፕ እጥንሱሻ፤ ኢንቻ ባ ዛራም ዛራም ይስቲ አፕ እጥንሱሻ ፔትማኬ» ማኩ። እብ ይሲንድ ይሲ ሀይሙሽዎጥን ፔቱ። ¹² ዶድ ይሲንድ ኮች ሀይ ጳርስን ሙእ አፓ ባ ዛራም ዛራም ይስቲ አፕ እጥንሱሻ፤ ኢንቻ ባ ዛራም ዛራም ይስቲ አፕ እጥንሱሻ ኤንዲ ጳቂንድ። ዮሪንድ እብ ይ ካዦሱሺስ ቤቁ። ¹³ እብሚንድ ዶዲ ጡሚ ዎንትን ካዝ አቅ አቱ።

14 ዩሪ «ጡማ፥ ፓዣ ይያም ኤርስትንሱዌሽን ሀይቅን ጫርቃን ይስቲ ሳማጌንዲ ሳምማኮ። ኢሣይቅኒንድ አብ ኤርታ፥ ዶዳ፥ ብያርጋ ኤንዲስ ፕያዳ ባ ማላትንሱዌሽን ፔትማኮ። 15 ዶድ ቶሕኒንድ ባና ጮብትንሱዌሽን ሀይቅን ጫርቃን ይስቲ ሳምማኮ» ማኩ። ኡሽ ይሲንድ ዩሪ ሀይጡሽዎጥን ፔቱ። 16 ዩሪንድ ኤዝ ኤዛ ሳማጌንዲስ ናም ይሡ። ይሲንድ አባሪ ፓሽዴንቲስ ኡካርስንሱዌሽና፥ እያርፒንድ ጡሚስ ኡካርስንሱዌሽን ይሡ። ይሲንድ ቃዝቂ ሻይትንዲስ ይሡ። 17-18 ዩሪንድ ኢሣይቅኒ ጡማማ፥ ፓዣማ ዶድ ዴብም ሳንቂ ኡርዳ፥ ጮብታይንድ ኢሣይቅናም ኤርስትንሱዌሽን ሀይቅን ጫርቃን ኢሣይቅኒስ ይሡ። ይሲንድ ኡሺ ይ ካዣሱሺስ ቤቁ። 19 ኡሻሚንድ ዶዲ ጡሚ ዎንትን አድ አቅ አቱ።

20 ዩራ «ካሣም ፕያጺ ይስኬንዲ ሶእቃን ፍጡንማኮ፤
ፑኪ አፕቲ ይስኬንዲንድ ዶድ ቶሕን ጫር ጎብቃን
ፑክማኮ» ማኩ። 21 ዩራንድ ኤዛ ኤርሰታርጌንድ አሩ
ሀርኬንዲስ ይሢ፤ ባ ዛራም ዛራም ሶእቃን ይስኬንዲስ
ካንግ ይሢ፤ ባ ዛራም ዛራም ይስኬንድ ጫርን ፑኪ
አፕታጌንዲንድ ካንግ ይሢ ኤንዲስ ድያዱዌ። ይሲንድ ኡሺ
ይ ካፕሱሺስ ቤቁ። 22 ዩራንድ ሶእ ጎብቃን ይስኬንዲስ
«ሶአ ባሀርቃን ጋጊ ፍጡንንዴ» ማኪ፤ ጫርን ፑኪ አፕቲ

ይስኬንዲስ «ዶድ ዴብም ቤሽንዴ» ማኪ ኤንዲስ ካንግ ዲሩ። ²³ኡሻሚንድ ዶዲ ጡሚ ዎንትን ኡሻ አቅ አቱ።

²⁴ዩሪ «ጊዛ፥ ባዝቂ አፕቲ ይስኬንዳ፥ ጾጥንዳ ኤንዳ ባ ዛርቃን ዛርቃን ይስቲ ካሣም ፕያጺ ይስኬንዲስ ዶዲ አሥማኬ» ማከን ኡሽ ይሲንድ ይሲ ሀይጡሽዎጥን ፔቱ። ²⁵ዩሪንድ ጾጥንዲስ ኢሥ ዛራም፤ ጊዝንዲስ ኢሥ ዛራም፤ ባዝቂ አፕታጌንዲስ ኢሥ ዛራም ይሡ። ይሲንድ ኡሺ ይ ካዦሱሺስ ቤቁ።

²⁶ዩሪ «አሢስ ኒሕዎጥን ኒሕ አምሣም ኒኒ ድያዴ። አሣይቅኒንድ ሶእ ጎብቃን ይስኬንድ አሩዋ፥ ጫርን ፑኪ አፕቲ ይስኬንዳ፥ ጊዛ፥ ዶድ ቶሕን ይስኬንድ ካንግ ካሣም ፕያጺ ይስኬንድ ዴብማ፥ ዶድ ዴብሚንድ ካንግ ኡካርስንማኮ» ማኩ። ²⁷ዩሪንድ አሢስ ባዎጥን ድያዱ፤ ይሲንድ ባሐጋ አምሣም አሣይቅኒስ እያና፥ ማይና ይሢ ድያዱ። ²⁸ይሲንድ አሣይቅኒስ «ቤሺ ጌቢ ዶድ ዴብሚንድ ጋጊ ዶድ ሀሺስ ጎቲ አሀንዴ፤ ሶእ ጎብቃን ይስኬንድ አሩዋ፥ ጫርን ፑኪ አፕቲ ይስኬንዳ፥ ዶድ ቶሕን ይስኬንድ ካሣም ፕያጺ ይስኬንዳ ኤንድ ካንግ ዴብም ኡካርስንዴ» ማኪ ዲሩ።

²⁹ይሲንድ ቃዝቂ «ታና ይንታይቅናጋ ሙእ ይሲ አትንሱዌሽን ካንግ ዶድ ቶሕን ይስኩሽ ሙአ አፕ አጢ ይስኩሻ፥ ኢንቻ አፕ አጢ ይስኩሻይስ ካንግ ታ ይንታይቅኔሽን ኡሣንቁዌ። ³⁰ካንግ ዶድ ዴብም ይስኬንድ ጾጥንዴሽና፥ ካንግ ጫርን ፑኪ አፕቲ ይስኬንዴሽና፥ ካንግ ባዝቂ አፕቲ ይስኬንዴሽና ኤንዳ ባ ካሣም ካሥኒ ፕያጺ ይስኬንዲ ሙእምሱሽ ኮሻ ሀያ ጨሊስ ካንግ ታ ዩሻሳንቁዌ» ማኩ። ኡሽ ይሲንድ ይሲ ሀይጡሽዎጥን ፔቱዌ። ³¹ዩሪንድ ካንግ ባ ይሡሽ ጋሂስ ቤቅንሲ አሣይቅናም ሶይሲ ካሻቁ። ኡሻም ዶዲንድ ጡሚ ዎንትን ሳፕም አቅ አቱዌ።

2 ¹ኡሻሚንድ ዶዳ፥ ጫራ አሣይቅን ጎብቃኒንድ ይስኬንድ ሸድ ጋሀንዲ ካንግ ድያስቲ ውሩዌ። ²ዩሪንድ ቃይጸ ባ ይስቱሺስ ውርስንሲ ይ ናፕም አቅ ጎቅን ባ ቃይጽቃን ካንግ ይርቹ። ³ይሲንድ ድያዳ ቃይጸ ባ ይስቱሺስ ውርስንሳ ይያም ጎቅን ባ ይርቹዌሽን ናፕም አቅ ኡሺስ ዲሪ ሶይሱዌ። ⁴ኤስን ዶዳ፥ ጫራ ድያስቲ ውሩሺ ኡሽዎጥና ጊዜዎ።

አዳማ፥ ሄዋና

ዩራ ካሒ ዶድ ይሣ፤ ጫር ይሣ ባ ድያዱሻም ⁵ ዶድ ቶሕን ጋሥ ዎል ቡሳርጊ ይስቱዌሽና፥ ዶድ ኡሺንድ ቃይጽንሱሺ ኤራሳንን ጋሥ ካይጉዌሽን ዶድ ቶሕን ኮቺ አትን ኤራሳንን ጋሥ ሺንኪ ጳቃርጊ ይስቱ። ⁶ ኡሽ ይሳንን ፔታስን ሶአ ዶድቃን ይስቲ ቱቃልኒ ኬስኪ ይስኩሺ ዶድ ኡሺስ ካንግ ስያጥሲ ይስቱ። ⁷ ኡሻሚንድ ዩራ ካሒ አሢስ ዶድ ቡይጥቃን ይሢ ድያድንሲ ይ ሲንጥቃን ጥያሣጉሽ ሸክ ሸኩ። ኡሻም አሥ ይሲንድ ባ ካሣም ጥያጺ ይስኩ አቱ።

⁸ ዩራ ካሒንድ አባሪን አጥ ኬስ ኬትን ኩሣ ኤዴን ማስቲ ይስኩሽን ሶይሲ ሶይጢ ይስኩሽ ካሻር ኩሥ ይሡ። አሣ ይ ባ ድያዱሺንድ ኡሽ ይቃን ይሡ። ⁹ ዩራ ካሕ ይሲንድ ኢንቻ ይ አፒ ባ ቤስታጉሽን ሶይጢ ባ ሙስታጉሽንድ ኤስኪ ይስኩሺስ ካንግ ጳርሱ። ሶይሲ ሶይጢ ይስኩሽ ካሻር ኩሥ ኡሽ ጸጽቃኒንድ ኢንቻ ካሥ ጥያጽ ያጥሳጉሻ፥ ኢንቻ ሶይ ጋሀ፥ ኢት ጋሀ ኤርሳጉሻ ኤንዲስ ጳርሱ።

¹⁰ ሶኢንድ ኤዴንቃን ይስቲ ኮሸኪ ዩኢ ካሻር ኩሥ ኡሽ ዴንትካን አቲ ባርቲ ዶድ ኒባሲ ይስቱ። ኡሽኒንድ ይስቲ ባ ቤሸኪ እድ ሻርሻም ኮሸኪ ሀንቂ ይስቱ። ¹¹ ሶአ ማጥ ኡሽ ሱሚንድ ፒሶን ማስቲ ዶዳ ኤውላጥ ማስቲ አንሢ ይቃን ያጥስቲ ይስኩሽ ዴንታም ኮሸኪ ሀንቂ ይስኩዌ። ¹² ዶዳ ኡሻጋ አንሢንድ ሶይሲ ሶይጢ ይስኩዌ። ዲልዩም ማስቲ ይስኩ ሺቱዋ፥ እኒክስ ማስቲ ይስኩሽ ንያላ ሶይሲ ሶይጢ አጢ ይስኩሻ ኤንዲንድ ዶዳ ኡሽካን ያጥስቲ ይስኩዌ። ¹³ ሶአ ናምናስኑሽ ሱሚንድ ጊዮን ማስቲ ይስኩዌ። ኡሽ ይሲንድ ኩሽ ማስቲ ይስኩሽ ዶድ ዴንታም ኮሸኪ ሀንቂ ይስኩዌ። ¹⁴ ሶአ ካዝናስኑሽ ሱሚንድ ጤግርስ ማስቲ ይስኩዌ። ኡሽ ይሲንድ አሶር ማስቲ ይስኩሽ ዶድን አባሪን አጥ ኬስ ኬትን ኮባም ኮሸኪ ሀንቂ ይስኩዌ። አድናስኑሽ ሶእ ሱሚንድ ኤፕራጢስ ማስቲ ይስኩዌ።

¹⁵ ዩራ ካሒንድ አሣ ባ ይ ድያዱሺ ኤዴንቃን ይስኩሽ ሶይሲ ሶይጢ ይስኩ ካሻር ኩሥ ጎብቃን ቃይጺ ይሲ ይ ባቂ ማኪ ይ ኤቲ ሀንቂ ይቃን ይ ይሡ። ¹⁶ ይሲንድ አሣ ኡሽ ይዩሽን «ካሻር ኩሥ ሀሸካን ይስኩሽ ኢንቻ አጥካን ካንግ ሙአ፤ ¹⁷ ኡሽ ይሳንን ፔታን ሶይ ጋሀ፥ ኢት ጋሀ ኤርሳጉሽ

ኢንች አጥካን ሙአሺዶ። ኡቭ አጥ ኔ ሙኡቭ ጎቅን ኢባራም ኔ ሀይብምሱዌ» ማኩ።

¹⁸ ዩራ ካሒንድ «አሢ ባ ካይ ይስትንሱሺ ሶይ ኤሳርጉዋጊስን ይስን ትያጥሚ ይ ጋሥንሱሺስ ታ ይስን ድያድንሱዌ» ማኩ። ¹⁹ ዩራ ካሕ ይሲንድ ዶድ ቶሕን ይስኬንድ ጸጥንዳ፥ ጫርን ፑኪ አጥቲ ይስኬንዳ ኤንዲስ ካንግ ቡይጣም ድያዱዌ። ይሲንድ ኢሣይቅኒስ አሥናሲ ሀር ማኪያን ሱምሥንሳን ቤቅኒ ይ ዳድን ኤቲ ዩኡ። አሥናሲ ይሲንድ ኤንዳ ባ ካሣም ፕያጺ ይስኬንዲስ ካንግ ሱምሡቸዎጥን ይያም ጸስቲ ሺዴንድ። ²⁰ ይሲንድ ካንግ ጊዛ፥ ካንግ ጫርን ፑኪ አጥቲ ይስኬንዳ፥ ዶድ ዴብም ይስኬንድ ጸጥንዳይስ ካንግ ሱምሡ።

ኡቭጎን ፔታስን ናሳ ኡቭን ትያጥሚ ይ ጋሥንሱሺ ያጥስታርጉ ይስቱዌ። ²¹ ዩራ ካሒንድ አሥናሲስ ኤርስታርጉ ሱድ ይ ሱሥን ሱርቅንሲ ይሲ ይስታጉቸን ይ ቲር ሜርትካን ማጥ ሜርት ጋዚ ኪስንሲ ይ ኩሢስ አቻም ካርሲ ጠጥሱ። ²² ይሲንድ ናሲ ቲርቃን ይሣ ባ ው ኪሴን ሜርቲስ ማይን አሢ ቃይጽንሲ ይዩቸን ው ኤቲ ዩኡ። ²³ ኡቭም አሥናሲንድ «ሀቭ ሜርታ ሀና ታ ሜርቱ፤ አቻ ሀኒንድ ታ አቻ ጊዛዎ። ውሲንድ እያንቃን ያጥስታንቄናጋ ማይን^{1*} ማስትማካ» ማኩ። ²⁴ ኡቭሽኒንድ አሢ ባ ባባ፥ ባያ ሺችንሲ ባ ማሽታ ባና ማጥ አትንሱዌ። ኢሣይቅኒንድ ባ ናማሲ ማጥ አሥ አትንሴንዴ።

²⁵ አሥናሳ፥ ይ ማሽታ ኤንዲ ባ ናማስ ጉዝ ካይ ይስቲ ዩል ኤትኩ ይስቱንድ።

ዩራ ሀይጡሺስ አሢ ባቃርጊ ሺዱ

3 ¹ ዩራ ካሒ ዶድ ቶሕን ድያዱቭ ጸጣ ካንጉቭ ዴንትካን ጸጥንባቢ ሶይሲ ማልትናጉቫጊ ይስቱ። ይሲንድ ማጥን ጎቅን አሢን ውይስ «ኢባሪ ዩራ ሶይሲ ሶይጢ ይስኩ ካሻር ኩሥካን ይስኬንድ ኢንች አጥካን ማጣጎን ሙአሺድንዴ» ማኪ ሀይጥንሲ ይስቱ?» ማኪ አጩ። ² አሢን ውሲንድ ጸጥንባብ ይዩቸን «ዩራ ካሻር ኩሥካን ይስኬንድ ኢንች አጥካን ሙእምዴ» ኑ ማኩዌ። ³ ይሲንድ ኤሳጎን ማካሲ «ኢንቻ ካሻር ኩሥ ጸጽቃን ይስኩቭ አጥ ሙአሺድንዴ፤

^{1*} 2÷23 አይሁድ አሥንድ ናን ጋሀም እያኒ ኢሽ ማስታ፤ ማይና ኢሻ ማስታ ይስኬናጉስን ኢሣይቅን ጸጊ ማጥ ሀርኪ ይስኩዌ።

ይስኒንድ ያፓሺድንዴ። ኡሺስ ይንታይቅኒ ኤስ ይሣን
 ሀይብምሲንቱዌ፣ ማኪ ኑም ሀይጥንሲ ይስኩዌ» ማኬን።
 4ኡሻሚንድ ጸጥንባቢ አሢን ውዌሽን «ሀይቢሴ ይንቲ
 ሀይብምሳርጉዋዳ፣ 5ዩሪ ኡሺስ ኤስ ማኩሺ ኢንች ኡሽ
 አፕ ይንታይቅኒ ሙኡሽ ጎቅን ይዎጥን አታንቂ ኢታ፣ ሶያ
 ባድ አሢ ኤሪ ይስኬንድ ኤርትናስንድ ይንታይቅኒ
 ፔትንሱሺስ ኤሪ ባ ይስኩዌሽና ጊዜዎ» ማኩ። 6አሢን
 ውሲንድ ኢንቻ ኡሽ አፒ ባ ሙስትንሱዌሽን ሶይጢ
 ይስኩሻ፣ አፓሚንድ ባ ቤስታጉሽን አሥ ኡላሲ ይስኩሻ፣
 አሢስ ኤርትናስ ባና አሥንሱዌሽኒንድ ሶይ ይ ፔቱሻይስ
 ቤቅንሳ ይ አፕ ጮጋ ሙኤን። ውሲንድ ኡሺስ ባ ቤስን
 ኡሥን ውዋ ባና ሙኡ። 7ኡሻሚንድ ኢሣይቅኒ ባ ናማሲ
 ግያርን ኤርት ያኪ ጉዝ ካይ ባ ይስቱሺስ ኤሬንድ።
 ኢሣይቅኒንድ ባላስ ማስቲ ሳትንሥ ሀርኩሽ ኢንች ሀይ
 ሲክንሲ ጊጺንድ።

8ኢሣይቅኒንድ ዶዲ ጡምሚ አቱሻም ዩራ ካሒ ካሻር
 ኩሥካን ኤካ ሀካ አፕቲ ይስኩሺስ ሲስኬንድ። ኡሻም
 አሥናሳ፣ ይ ማሽታ ዩራ ካሕ አፕም ካሻር ኩሥካን
 ይስኬንድ ኢንች ዴንትካን አሽቱንድ።

9ዩራ ካሒንድ አሥናስ ይይስ ጼጊ «ኔ ሀርቃናዎ?»
 ማኩ። 10ይሲንድ «ካሻር ኩሥካን ኤካ ሀካ ኔ አፕታ
 ይስኩሺስ ሲስክንሳ ጉዝ ካይ ታ ይስቱዌሽን ሸርቅንሳ ታ
 አሽቱዌ» ማኩ። 11ዩሪንድ «አናጊ ጉዝ ካይ ኔ ፔቱሺስ
 ኒዩሽን ሀይጣዴዎ? ኢንች አፓ (ሙአሺዶ) ታ ማኩሽካን
 ሙእምሳኔ?» ማኩ። 12ኡሻሚንድ አሥናስ ይሲ «ታሐ ባና
 ው ይስቱ ማካ ኔ ታም ኡሄን አሢና ኢንች ኡሽ አፕካን
 ታም ኡሥን ታ ሙኡዌ» ማኩ። 13ዩራ ካሒንድ አሢን
 ውይስ «ጋሀ ሀሺስ ዎስ ማካ ኤስ ይሣዳ?» ማኩ። አሢን
 ውሲንድ «ጸጥንባባጊ ታ ብያሥን ታ ሙኡዌ» ማኬን።

14ዩራ ካሒንድ ጸጥንባብ ኡሺስ «ኡሺስ ኤስ ኔ
 ይሡዌሽን ጊዛ፣ ጸጣ ዶድ ቶሕን ካንግ ይስኬንድ ዴንትካን
 ዱርታስናንቃ ይስኩ ፔታም። ኒ ሺላሚንድ ባዝቃ ካሣም
 ፕያጸ ኔ ይስኩሽ አባሚንድ ካንግ ቡይጥ ኔ ሙእምሱዌ።
 15ኒያ፣ አሢና ሀና፣ ኒ ዛራ፣ ው ዛራ ኤንዲስ ጋግናስንድ
 ታ አሥንሱዌ። ይሲ ኒ ቂር ጣንጭን ኔኒንድ ይ ቶእ
 ቂርንቂችካን ሳጽንሱዌ» ማኩ።

16ዩሪንድ አሢን ውዌሽን «ኔ ቃንቃጉሻም ኒ
 ኢራቲስ ቃጽ ታ ቤሻስንሱዌ፣ ኢራታሚንድ ኔ ዩልንሱዌ።

ኒ ቤሲንድ ታሳ ኒ ዳድን አሳ ኒም ይሲ ሀይጢ ይስኩሻም ኔ አቅንሱዌ» ማኩ።

17 አሥናስ ይዩሽኒንድ «ኒ ማሸት ጋሀ ሲስካ (ሙአሺዶ) ታ ማኩሽ ኢንች አፕካን ኔ ሙኡዌሽን ዶዲ ኒያም ባ ዶንቱሽ ዱርታስንማኬ፤ ካሳም ፕያጸ ኔ ይስኩሽ አባሚንድ ካንግ ዶዳ ሀሺስ ቃይጸ ጋምጣ ኔ ሙእምሱዌ። 18 ዶዲንድ አሙዋ፥ ጎሽታ ጳርስንሱዌ። ኔኒንድ ዶድ ቶሕን ሺንኪ ጳቂ ይስኩሺስ ኔ ሙእምሱዌ። 19 ይቃን ይስታ ኔ ያፕስቱሽ ዶድቃኒንድ ሀይቃ ኔ ካርታጉ ሀክ ኒ ሙኢስ ኒ ኤርከናም ቃይጸ ኔ ያፕምሱዌ። ቡይጥቃኒንድ ድያስቱዋጋ ቡይጥቃን ኔ ካርትንሱዌ» ማኩ።

20 አዳሚንድ ይ ማሸታ አሳ ካሳም ፕያጸ ይስኬንድ ባይ ው ፔቱዌሽን ሄዋን^{2*} ማኪ ው ሱምሡ። 21 ዩራ ካሒንድ አዳማ፥ ይ ማሸታ ማእንሱ ቤት ዩሻስንሲ ኢሳይቅን ማይሱ።

22 ዩራ ካሒንድ «ሀሻ! አሥናሲ ሶይ ጋሀ፥ ኢት ጋሀ ባ ኤርንሱዌሽን ኒሕቃን ማጥናስዎጥን አታንቁዌ። ካሲ ሀሽ ይሲ ካንግዎይን ካሳም ፕያጸ ይስትንሱዌሽን ባ ኩቻም ካሥ ፕያጸ ያፕሳጉ ኢንች አፕካን ጮጊ ሙአሺድማኬ» ማኩ። 23 ኡሼሽኒንድ ዩራ ካሒ አሥናሲ ይቃን ባ ያፕስቱሽ ዶድ ቃይጸ ሙኤ ማኪ ኤዴንቃን ይስኩሽ ካሻ ኩሥካን ይሢ ይ ብያሪ ኬሱ። 24 ይሲንድ ይ ብያሪ ባ ኬሱሻም ኤዴን ካሻ ኩሥን አባሪን አፕ ኬስ ኬትን ኮብ ኪሩቤል ማስቲ ዩርን ሶይጣንቂ ይስኬንድ ኩሥ ባቃጊንዲ ካሥ ፕያጸ ያፕሳጉሽ ኢንች ዳድን አሳ ይስኩ ቦድ ኡሺስ ባቄ ማስቲ ይሡ። ይሲንድ ቃዝቂ ሺፓ ታም ሳምዎጥን ሳንቂ ኪርኪር ካርቲ ይስኩሺንድ ኩሥ ኡሽን ይሡዌ።